

DISSERTATIO IN AUSECUTUM
DE
PHANTASIAE
USU,
LUSU ET ABUSU
IN MEDICINA,

QUAM

ANNUENTE DIVINI NUMINIS GRATIA,
IN ILLUSTR. ACADEMIA FRIDERICIANA,
GRATIOSÆ FACULTATIS MEDICÆ CONSENSU,

P R A E S I D E

DN. D. MICHAELE ALBERTI,
POTENTISSIMI REGIS BORUSSIAE CONSILIARIO

AULICO, MEDICINÆ ET PHILOSOPHIÆ NATURALIS
PROFESSORE PUBLICO ORDINARIO, ACA-

DEM. CÆSAR. NAT. CURIOS. COLLEGA,

FACULTATIS MEDICÆ DECANO. SPECTATISSIMO,
PATRONO AC PRÆCEPTORE SUO OMNI OBSERVANTIA COLENDO,

PRO GRADU DOCTORIS,

SUMMISQUE IN ARTE MEDICA HONORIBUS, INSIGNIBUS
AC PRIVILEGIIS MORE MAJORUM SOLENNI OBTINENDIS,

HORIS ANTE- ET POMERIDIANIS.

D. XXIX. AUG. MDCCXXII.

PUBLICÆ VENTILATIONI SUBMITTET,

CHRISTIANUS GOTTOFREDUS *Behrisch*
D R E S D E N S I S.

HALÆ MAGDEBURGICÆ,

Typis JOANNIS CHRISTIANI HENDELII, Acad. Typogr.

CUI POTIUS QUAM PARENTI

JUXTA PUBLICAM REM,

ME ET FRATRES

CURANTI, SERVANTI

HIERONYMO GOTTOFREDO BEHRISCHIO,

PER LI. ANNORUM DECURSUM

CIVITATIS DRESDÆ,

VICISSITUDINES AULÆ

SERENISSIMORUM DUCUM ELECTORUM SAXONUM,

QUATER EXPERTÆ, EMENSÆ,

JAM ET GLORIÆ MAJESTATIS REGIÆ OBSEQUIOSÆ
SYNDICO,

DEO DANTE, NONDUM DEFATIGATO

DISSERTATIONEM HANC, IN PANEGYRI

ACADEMIAE HALENSIS.

Apprimæ jam florentis, defensam,

Dem, dicam, dedicem?

Do ergo, TIBI, Mi PARENS devotè

Cum Voto ulterioris TUÆ felicitatis:

Dico grato animo, pro educatione

Tam sollicita & provide indulgenti;

Dedico, cum suspirio ad DEUM ardenti

Ut mores, quibus ab

Avô, viro ut refertur benefico & singularis sagacitatis,

Patre probò docto & justì tenaci,

Afuetus es

Ad nepotes quoque & qui ab illis nascentur

Transcendant perennent,

Ne illis, ut DEUM verentibus,

Nec porro desit quippiam!

Filius Tuus

CHRISTIANUS GOTTOFREDUS.



PROOEMIUM.



Quando commercium animæ cum corpore *Plato* quadantenus exponere suscipit, tunc *Lib. 3. de Republ.* dicit *mibi quidem non videtur bene affectum corpus, vi sua bonum animum facere, sed contra bene affectus animus, vi sua corpus, quoad fieri potest, optimum reddere: quod enim anima cum corpore multis modis, imo indies communicet, forte passim abunde a multis demonstratum fuit; quod etiam energia animæ in suum corpus præpotens sit, vicissim copiosa confirmant testimonia, quare in Philosophia æque ac Medicina utile & necessarium opus est, quando animæ activitas in habitaculum suum rite & perspicue enucleatur & quando inde pendent diversæ alterationes solide ac ingenue explicantur: grave enim periculum est, animam negligere, dixit idem *Plato*: quantum vero sæpe animus in indagatione rerum & circumstantiarum*

A

utili-

utilium a veritate discedat & falsis contemplationibus, figmentis ac opinionibus operam det, perinde quotidiana observatio testatur: quare cum *Lactantio* asserimus, quod *primus sapientia gradus sit, falsa intelligere & secundus, vera cognoscere*: etenim in multarum rerum inquisitione, mira sibi concipit animus, quæ tamen cum iisdem rebus haud conveniunt, quare spurios tales conceptus a rationali, prudenti, judiciofa & vera deliberatione exacte discernere expedit: ita enim *Philo* in loco *de abrahamo* confessus est, quod *animus sit quasi θαυματουργὸς histrio invisibilis*, qui lepida ratione interdum componit dividenda & dividit componenda, adeoque monstra parit: & ita μετὰ πολλῆς φαντασίας animus sæpe cum rebus scientificis procedit, ubi illa, quæ ex vero indagare & demonstrare haud potest, cum operosa phantasia fingit & pro vero nonnunquam proponit: quare *Quintilianus lib. 6. c. 3.* dicit: *quas φαντασίας Græci vocant, nos sane visiones appellamus, per quas imagines rerum absentium ita representantur animo, ut eas oculis cernere ac præsentibus habere videamur*: has quisquis bene conceperit, is erit in affectibus potentissimus; hunc quidem dicunt εὐφαντασιώτην, qui sibi res, voces, actus secundum verum optime fingit: eadem ratione nonnulli Rhetores Phantasia vocant conceptum mentis, qui fingitur de aliqua re, qui tamen in ipsa re non adest: *conf. Vossius lib. 6. Instit. orat.* tanta luxurie & vagabunda activitate interdum anima cum phantasia procedit, quando veritati studere debet: & licet in variis casibus providus ingenii usus non rejiciatur, tamen magna cura vigilandum est, ne perver-

si &

¶ & vani lusus, ausus & abusus cum Phantasia committantur, qui deinde speratam veritatem & desideratam utilitatem magis opprimunt, ut de tali sinistro usu ingenii illud *Seneca de Providentia c. 4.* valeat: *movet cerebrum, in vanas mentem imagines evocat, multum inter falsum & verum media caliginis fundit & quod confirmat Plutarchus de profectu virtutum: ingenium semper aliquo citatum motu, ac veluti in trutina situm, nunquam non momento aut ad meliora facto fertur, aut in diversam partem ad mala exitiose impellitur: conf. Seneca Ep. 8.* dum itaque in tales errores adeo prona est anima cum phantasia, imo dum in multis subjectis hoc ingenium admodum agile, præceps & inconstans est, ita sincerus phantasiæ usus in omni disciplina inculcari & commendari debet: neque quidem hoc loco de subtili illa imaginationis efficacia loquimur, quæ perinde multorum monstrorum architecta & mater est, sed potius differimus de illo deliberato & arbitrario usu phantasiæ in rerum indagatione & scientifica explicatione, qualem usum admodum succinctum & providum commendamus, & sicut *Seneca in Consol. ad Marciam c. 23.* dixit, *ingenia quo illustriora eo breviora*, quod idem est, ac illud in vernacula cognitum *Fluge Kinder sterben bald, oder werden nicht alt*: uti *Cato Censorinus* dixit: *senilis juvenus, præmatura mortis signum est, conf. Plinius lib. 1. c. 51. Rejesius Camp. Elys. qu. 78. n. 14.* ita nos sub alia interpretatione, dicimus, ingenium (i. e. phantasia) quo illustrius, eo brevius est, quod idem est ac si dixerimus in eruendis veritatibus & proponendis solidis demonstrationibus non diu phanta-

fiæ studendum & inhærendum est, quoniam illa ex philavtia, in quam facile incidit, variis erroribus committendis idonea est : seducit enim illa ad varias steriles & lepidas curiositates, sub maximo negotio, tamen versatur in otio, invenit sæpe qualitates demonstrativas & falsas, supponit res, quæ deinde nuda entia rationis, imo non entia sunt, tractat aliquando de quibusdam subjectis ita nitide & lepide, ut innocentes & molles mentes subito occæcet, sed eo ipso etiam veras considerationes corrumpit & cum falsis & perversis explicationibus confundit, subinde ingenuam illarum rerum utilitatem destruit ; interdum quidem implicata extricat, sed aliquando iterum extricata implicat, ut nisi valde circumspecte tractetur, citius damnum, quam commodum pariat : talis est facies phantasiæ in multis negotiis, ut propterea varii stupendos effectus eidem imputare non sint veriti, cujus rei mentio facta fuit in *Dissertationibus de Valetudinariis imaginariis & de Therapia Imaginaria* : quid emolumenti, quidve nocumenti usus, lusus & abusus phantasiæ in Physica, Mechanica, Anatomia & Chymia afferat, illos haud latet, qui ante præmaturum & præcipitatum judicium aut præjudicium omnes circumstantias provide & solide perscrutantur, neque de eo contenti sunt, quando, ne nihil dixisse videantur, pro lubitu sibi absconditas res concipiunt : haud enim ignorantia est, ignorantiam confiteri, quoniam multarum rerum cognitio captum & vires hominis superat ; unde consultius est, illam ignorantiam, quæ corrigi non potest, ingenue confiteri, quam fucatam Pansophiam affe-

affectare & falsa veris immiscere : sicut enim secundum *Augustinum de civit. Dei. lib. 22. Morborum genera non omnia in medicorum libris sunt comprehensa*, ita secundum *Galenum de atra:bile non omnium morborum causa & qualitates, medicorum animis sunt inscripta* : & possumus sub justa & reservata limitatione cum *Celso* consentire, qui dixit *nihil in medicina adeo certum est, quam nihil certum* : propterea vero non decet omnia pro fabulis aestimare, alias illud *Rejesii p. 818. valet* : *qui omnia pro fabulis habet, ipse se fabulam facit* ; quantas vero fabulas concipiat & pariat phantasia, neminem facile latere potest, unde omnibus hominibus familiare est, etiam noctu talia phasmata sub somno experiri ; quantus porro luxus, ausus, usus, lusus & abusus præter omnem necessitatem & utilitatem interdum committatur cum phantasia, a diversis hominibus, qui alias cum hac operatione mentis admodum exercitati & operosi existunt, *die sich leicht eine Sache einbilden können*, aut qui cum semel suscepta imaginatione valde contumaces sunt, uti prioris indolis sanguinei, posterioris vero melancholici temperamenti homines sunt, id sane quotidiana observatio affatim comprobat : nos hoc loco minime extra sphaeram spatari volumus ; id tantum attentæ & prudenti deliberationi subijcimus, quantum ministerium Phantasiæ in Medicina valeat, in qua multa præfigurantur, quæ in rerum natura non deprehenduntur ; ubi etiam varia ex phantasia in usum trahuntur, quæ modo crassa ignorantia, alibi foeda superstitione, interdum lepida opinione, quandoque sordida philavtia, nonnunquam cæca Em-

piria, aliquando præjudicioſa hypotheſi nituntur, ut facile liqueat, quomodo ſatis ſæpe hæc phantaſia in foro Medico ſcoparum vices ſubire debeat, quando variæ inconuenientes ideæ corraduntur & ex hac quiſquiliarum & palearum maſſa pompoſa multisque phantaſmatum coloribus exornata theoria conſtruitur: ne itaque tam ſacræ tamque ingenuæ veritati tanta inexcufaibilis vis & injuria inferatur, dignum omnino nobis videtur negotium, quo verus & ingenuus uſus Phantaſiæ in Medicina indicetur & commendetur, nocivus vero viciffim abuſus exponatur & expellatur: & dum nobis hoc loco incumbit Inaugurali aliquo ſpecimine utile quoddam thema Medicum prodere & proponere, ita nobiſcum conſtituimus nonnulla DE USU LUSU ET ABUSU PHANTASIAE IN MEDICINA monere & explicare, quo inutiles contemplationes theoreticæ & abuſus practici evitentur, veritas vero viciffim & certitudo in Medicina in ſincera ſua integritate conſervetur. Annuat itaque DEUS Benigniſſimus noſtro propoſito gratia ſua, ut exoptatum ſcopum, DEO acceptum & proximo ſalubrem, largo fructu impetret.

§. I.

ET ita Sermo noſter verſatur circa *Uſum, Luſum & Abuſum Phantaſiæ in Medicina!* priuſquam vero rem ipſam proponamus, brevibus annotabimus, quid *titulus* contineat & promittat: de *Phantaſia* præcipue *nonnullas* animadverſiones, quæ ad ſcopum *medicum* ſpectant, commenda-

bimus:

bimus: quid per hanc intelligamus, non necesse erit multum describere, quoniam cum *vulgari* illius acceptione consentimus: est itaque nobis in *diversa* notione *Phantasia*, *ingenium*, *imaginatio*, *præfiguratio*, *cogitatio representativa* unum idemque, dum cum hac operatione anima cum *talibus* ideis fatis *strenue*, aliquando plane *tenaciter* occupata est, quas sub exquisitis *figuris*, ut plurimum vel *acceptis*, vel *adversis* format, reformat, tractat, volutat & concipit, unde recte in vernacula dicitur eine *Einbildung* / ubi anima tale subiectum *visibile intrinsecus* sibi præfigurat, iterumque *repræsentat*: de hac *Phantasia* in *duplici subiecto* hoc loco nobis differendum erit, in quantum videlicet *Medicus* artifex *suam* *Phantasiam* applicat, in *cognoscendis* & explicandis rebus ad *suum* negotium pertinentibus, in *inveniendis* nonnullis methodis, quibus cum emolumento in sua *praxi* uti potest, in *excogitandis* quibusdam *honestis* stratagematibus, quibus aliquando indiget in ægrotantibus *sensibilibus*, delicatis & cum multa *phantasia* perinde operosis: deinde idem artifex aliquando commercium habet, cum *phantasia ægrotantis*, qua utitur ad impetrandos *salutares* effectus, cui quandoque *moderatur*, ne *reliquæ Therapiæ* perniciosas *offensas* inferat, quam aliquando *allicit* & provocat, quo *connexi* necessarii motus *una* excitentur & revocentur: exinde liquet, quam *multiplex* occasio occurrat, qua circa *Phantasie directionem* in *medicina* prudens *Therapevta* versari debet: hujus *Phantasie* itaque *verum*, *licitum*, *honestum*, *efficacem* & *salubrem* usum in foro medico indicabimus: proinde quidem una monēbimus, quales *Lusus* cum eadem in *Medicina* interdum committantur, i. e. quam *jucundæ* & *ridiculæ* interdum actiones *phantasie* ad *utiles* effectus provocandos inserviant, imo quomodo nonnunquam *talia* negotia cum *phantasia* suscipiantur, quæ quidem *veritati* non penitus repugnant, sed quæ *evidentem utilitatem* haud promittunt, sed quæ potius *superflue* adeoque *molestæ* sunt; quod denique *Abusum* con-

cer-

cernit, tunc ille admodum *frequens* in foro medico potius *præoccupandus* & *explodendus* erit, ne & *veritati* medicæ & *salubritati* patientis noxam inferat: & hic *Abusus* consistit in illa *phantasiæ* applicatione, quæ circa res *factas*, *falsas*, adeoque *inutiles* & *noxias* versatur, quæ tamen sibi *persuadet*, ac illa negotia, quæ sub tali abusu committuntur, *necessaria* & *utilia* existant, cum tamen exinde varia *detrimenta* oriantur, quæ attentis & a *præjudicio* liberis subjectis facile innotescunt: ne itaque in *Medicina* *Phantasiæ* *nimum* tribuatur & inhæreatur, eapropter *reliquæ* facultates animæ *conciliandæ* sunt, ita ut *omnes* circumstantiæ bene *comparentur* & prudenter *dijudicentur*, *salubres* & *insalubres* successus & effectus memori mente teneantur & assidue *conferantur*, adeoque omnia negotia cum fundata & ingenua *ratione* tractentur: enim vero cum in foro medico multa occurrant, quæ *sensus* valde afficiunt, ita facile phantasia illis *irretita* tenebitur, quo magis *externas* rerum qualitates perlustret: ita enim *Physica* & Regnum Naturæ *tantam* supellectilem subjectorum subministrat, ut varia *circa*, *ante* & *infra* nos extent, quæ *oculos* allicere possunt: hinc *Botanica* & *Materia Medica*, non minus *Musea curiosa*, proinde *Anatomia*, *Chymia* tam *pharmaceutica*, quam *Metallurgica*, multa subjecta & producta *sensibus* nostris subjiiciunt, ut *curiosa* phantasia perpetuæ *servituti* addicere & in *splendidum* ac speciosum tale promptuarium totam se immergere facile valeat; inde oriuntur *mancipia* *Phantasiæ*, quæ in foro medico *nihil rectum* esse putant, quod non cum *Phantasia* comprehendere potest: & dum nonnulli mediante *Phantasia* *perspicuum* conceptum prosequuntur, evenit inde, ut in *eximiam confusionem*, *incertitudinem* & *obscuritatem* incidant: quare invigilandum est, ne *verus* & *sincerus* *Phantasiæ* *usus*, in *sterilem lusum*, aut *perniciosum abusum* immutetur.

§. II.

Sed ne nos ipsi *censura* quadam digni videamur
dum

dum accusari queamus, quasi præfenti labore *nodum* in *scirpo* quæreremus & rem *otiosam* tractarem, ita nunc necesse erit, quo hanc nostram considerationem *vindicemus*, illiusque *utilitatem* in *Medicina* indicemus: verum enim vero licet hoc themate diversos *navos* & *steriles* occupationes in *Medicina* significemus, tamen hic labor *illum scopum* habet, quo *inutiles* & *perniciosæ* tales occupationes *Phantasiæ* e foro medico *proscribantur* & *Theoria* æque ac *Praxis* *Medicæ* suæ *certitudini* & *integritati* restituatur, exinde monemus, quomodo *hujus* considerationis *usus* & *utilitas* sese ad *Theoriam* & *Praxin* *Medicam* extendat, & quomodo illa propterea non *otiose curiosa*, neque *nude speculativa* existat: quemadmodum enim in *genere duplex* labor *ingenuo* *Medico* incumbit, *primo* ut *salutaria* subiecta & negotia magis magisque *confirmet*, augeat & illustret, deinde *inutilia*, *otiosa* & *perniciofa* præscindat & *avertat*, ita posteriori officio præfens nostra tractatio accensenda erit; inde enim eveniet, ut *veritas* & *certitudo* in *Medicina* magis stabiliatur & confirmetur: Quod enim *Theoriam* *Medicam* attinet, ecquis non confiteatur, quod in eadem multa *phantasmata* occurrant, quæ magno studio expurganda sunt; multa quæ interdum pro *coloranda* quadam hypothese neque *re* neque *facto* succurrunt, ex *phantasia* finguntur & cum *phantasia* pinguntur: inde oriuntur tot *vermiculi*, tot *globuli*, tot *hamuli*, tot *ramuli*, tot *bullule*, tot *spiritus*, tot *cuspides*, tot *spicula*, tot *nissus*, tot *elateres*, tot *reactiones*, tot *obstructiones*, tot *nervorum consensus*, tot *spirituum seditiones* & tumultus, tot *salium* geneses, tot male applicatæ potentiaë *mechanicæ*, tot *allegoriæ*, tot *chimæræ*, tot *phantasiæ* &c. &c. &c. & quæ non *monstrorum speculationum* cum *phantasia* genitarum, passim circumvolant! quæ, cum tantas *vexas* tantaque tormenta *theoriæ* *medicæ* inferant, ea propter *cordati* & *attenti* *medici* semper inveniunt occasionem quo ab ejusmodi *inutilibus* quisquiliis *Medicinam* repurgent; quicunque vero *theoriam*

medicam parvi pendunt & in medicina pro *superfluo* negotio æstimant, subinde non nisi *ad Praxin* omni verborum lenocinio, luxu & ostentatione provocant, illi etiam certi esse possunt, quod præsens nostra meditatio in ipsa illa *operosa Praxi* multiplicem utilitatem promittat; quantæ enim *Phantasiæ frivolaë* in *Uromantia*, *infantum*, *feminarum*, *delicatorum*, *enervatorum* &c. *Therapia*, in *mensium* vitiis, *febris* *intermittentibus*, *remediorum* numero, *forma*, *colore*, commendatione, usu, *characteris* &c. &c. committantur; quis est, qui inter peritos & ingenuos *Practicos* ignoret? & quot non *lepidaë* phantasiæ deprehenduntur in *egroto*, quot in *medico*, sic *ludit* interdum *Phantasia* cum *Phantasia*; & quemadmodum magis ad magis additum, illud auget, ita ex *Medico* *Phantasiæ Patrono* & *ægotante* *Phantasiæ servo* nascitur *eximia* *Phantasiæ chimæra*; & cum alias *prudens* *Medicus* in *quacunque* cura exercere debeat *rationale* artificium, ita potius hac via construet splendidum *Phantasiarum* inutilium *seminarium*: ne vero tanta opinionum & *Phantasiarum* vigeat *luxuries*, propterea meliori jure in *Medicina* desideratur *solidum judicium*, adeo ut in *Theoria* æque ac *Praxi* *Medicus* esse debeat *judiciosus*: minime tamen illi injuriam facere lubet, quasi *sterili* *Phantasiæ studio* addictus sit; illud tantum in consequente explicatione demonstrabimus, ubi cum *commodo* aut *damno* in *Medicina* *Phantasia* exerceri queat: quicumque vero hos scopulos evitare gestit, quo a *sterili* *Phantasiæ studio* liber & salvus maneat, ille *credulitatem* & *superstitionem* medicam fugiat, neque tam facile & promiscue *singulis physicis* persuasionibus fidem det, multo minus *immaturæ* & *præmaturæ* applicationi *experimentorum physicorum* & *chymicorum* ad corpus animale *vivum* operam impendat, sed omnia prius *exacte* ponderet, *comparet* & denique dijudicet: omnium maxime vero observare convenit, ubi *multum splendoris* coloris & honoris

honoris est in medicina, ibi enim *multum phantasiæ* latet: opus laudat artificem! *veritas* non indiget *rhethore* & *patrono*; quo *simplicior* est hæc *veritas* eo *sincerior* existit: at tamen hæc *simplicitas* *discernenda* est, a *vulgari opinione*, *credulitate* & *superstitione plebis*: has *genericas* & *paucas* *regulas* si observaverit *medicus*, *facilius* a *sterili phantasiæ* *exercitio* *immunis* manebit: alias vero sub *promiscua* *Medicinæ* *tractatione* illud *lemma* valet, quod *alia* & *communi* *enunciatione* *proponitur*, quod *mundus opinionibus* *regatur*, nos vero ab *universali* ad *particulare* *transeuntes*, dicimus & *facili negotio* *probabimus*, quod *Medicina* *multis* *modis* *regatur opinionibus* & *phantasis* & *hisce* *quidem* *plus inutilibus*, quam *necessariis* & *fructuosis*.

§. III.

Accedimus nunc ad *specialem* *thematis* *nostri tractationem* & *enarrabimus quedam specimina* *usus*, *lusus* & *abusus Phantasiæ* in *Medicina* & *quidem primo loco* *nonnulla* ad *Theoriam medicam* *pertinentia* *perlustrabimus*: vulgo *Medicus* *salutatur Minister Naturæ*, *quantæ* *vero* *ac* *quot Phantasiæ* *de Natura* in *schola medica* *vigeant*, *facile liquet*: est itaque *lusus Phantasiæ*, quando *certus Archeus* *supponitur*, cui *Naturæ vices* *demandantur*; per hunc *certus motor* & *director functionum vitalium* *intelligitur*, qui *juxta sententiam Helmontii* *μετὰ πολλῆς Φαντασίας* *cum multis* *qualitatibus* *instructus* *creditur*: & *hanc opinionem lusum* *Phantasiæ* *esse* *dicimus*, quia *hic Archeus reale* *quoddam principium activum* *denotat*, quod *negotiis* *ad vitam*, *sanitatem* & *reliquam corporis tutelam* *spectantibus* *præsidet* & *sub hoc ficto nomine* *indicatur*: *perinde Lusus Phantasiæ* *est*, quando *tot naturæ*, *aut principia actionum* *supponuntur* & *funguntur*, *quot partes principales* & *functiones eminentes* in *œconomia animali* *occurrunt*, ubi *alius motor* in *corde*, *alius in cerebro*, *alter in ventriculo* &c. *dominari* *asseritur*: insignis
lusus

lusus & abusus phantasiæ committitur cum famosis illis spiritibus sive liquido nerveo, quibus ex analogia summæ mobilitatis, quæ in æthere deprehenditur, talis ætherea qualitas affingitur: neque hoc tantum, sed per eundem abusum phantasiæ multiplicantur entia præter necessitatem & in varias sectiones, turmas, legiones, cohortes discescunt, adeoque nonnulli vitales, alii naturales, quidam animales, alteri genitales nuncupantur, quibus dirigendis anima rationalis, tanquam dux aut legatus præponitur, cujus mandatum exequi tenentur: iisdem spiritibus affingitur vis motrix, commercium cum anima & obsequium erga animam, certus gradus notitiæ, influxus intra nervos, inflatio partium musculosarum & connexa actio locomotiva sive voluntaria: inde ex ludicra phantasia finguntur, pinguntur & supponuntur tot vesiculæ in partibus carnosæ, quas illi spiritus sub influxu distendere & talem motum perficere traduntur: quo illud experimentum anglicanum pertinet, cujus reminiscuntur Borellus de Motu Animalium & Sturmius in Colleg. curios. Part. 2. tentam. XI. sub titulo de nova quadam potentia mechanica musculorum actiones stupendas in corpore animali egregie illustrante & oculis ipsis quodammodo demonstrante: & quis enarret singulas illas phantasias, quæ in hac comædia cum spiritibus luduntur, ubi mox lucidi, mox tenebricosi, modo influi, modo insiti, hic tristes, illic hilares, nunc rotundi, iterum angulares, jam peregrini & sylvestres, alibi terrestres, mox humidi, iterum siccæ, nunc ex astrorum influentia provenientes, deinde alimentosi, modo radiantes, alibi obscuri, partim nobiles, partim ignobiles, finguntur: quantæ porro non passim committuntur phantasiæ, quando horum spirituum actiones explicantur, nunc rident, nunc vident, nunc olent, nunc dolent, nunc audiunt, nunc gaudeunt, nunc gustant, sentiunt, ideas formant, ideas communicant, ideas intra cerebrum transvehunt, velut formicæ sua ovula, nunc cum anima

confa-

confabulantur, nunc ipsius *mandata* exequuntur &c. quales *ridiculas* & cum multa *phantasia coloratas* theorias fufius & cum multo studio propofuit *Wirdigius in nova Medicina spirituum curiofa* : adeo ut in hac theoria nullus *sincerus ufus*, rectius vero *multus lufus* & *magnus abufus* committatur : propterea *veritati* medicæ confulitur, quando *lepide* tales phantafiæ e theoria medica eliminantur; prodit etiam adhuc *inutilem* phantafiam, quando hæc non entia pro *caufa* motuum vitalium *principaliori*, ex incongrua analogia & allegoria ab æthere defumpta, aflervantur & fupponuntur : fi itaque non entium nulla funt prædicata, ita theoria de *spiritibus* prodit ftudium & Patrocinium Phantafiæ : fimiliter *abusus phantafiæ* eft, quando juxta *Peripateticorum* mentem, *triplex anima* fingitur, ubi una *ſingulis* officiis ſub-eundis & adminiſtrandis ſatisfacit ; ut propterea *ſupervacaneum* ſit, *vegetativam* & *ſenſitivam* animam propterea ſupponere, quia *ſenſus* & *vegetatio* non ſunt *ratio*, hinc pro *diverſo actu*, *diverſum principium* conſtituere, phantafiæ fœtus eſt.

§. IV.

Quando in *Theoria medica* aſſeritur, quod *anima hominis rationalis* illud principium ſit, quod vulgo *Natura* audit & alibi *Archeus* vocatur, tunc vulgo illa præceps obſectio occurrit, quaſi nemo *concupere*, i. e. cum *phantasia* comprehendere poſſit, *quomodo* anima in corpus operetur, *quomodo immateriale afficiat materiale* : exinde facile liquet, quam præceps ſit lapſus & refugium ad *phantafiam* : exinde vero etiam mox ille *cardinalis* error inclareſcit, quaſi nulla res pro *vera* ſit habenda, quæ non cum *phantasia* comprehendatur : inde etiam contingit, ut ad *diſtinctum* & perſpicuum conceptum formandum, interdum variæ *lepide* & *ridicule phantafiæ* colligantur & applicentur, proinde etiam *veritas medica* magis opprimatur ; in præſenti enim conſi-

deratione innotescit etiam *alter ille catholicus error*, quasi nulla detur *motuum propagatio* nisi per *materias*, interveniente *contactu physico*, ob id etiam nonnulli *animæ* hanc capacitatem denegant, quod corpus movere valeat, quia hoc contingere non potest: quo vero *dubitantium phantasiæ* subveniamus, habet etiam in hoc negotio *phantasia aliqua-lem usum*: quod enim *anima corpus* aut *materiam* movere possit, testantur *quotidiana phænomena* tam *motuum voluntariorum*, quam *patheticarum commotionum corpus* varie alterantium: cui etiam placuerit in hisce phænomenis ad *spiritus* confugere, tanquam ad spurium illum *phantasiæ* fœtum, illi sciant, quod dum *anima spiritus* movet, insuper *capacitate* illa polleat, qua in *materiam* operari potest: salvo itaque hoc asserto, proinde sciendum est, quod *effluxus motuum ex anima & ingressus* illorum in *corpus* minime cum *phantasia* comprehendi possit, interim in eo *aliqualem usum* habet *phantasia*, quando concipere possumus, *quomodo anima* cum effectu *constrictorio & relaxatorio* in partibus *ner-voſis*, *fibrosis & membranaceis* functiones *vitales* adminiſtret, quomodo sub effectu *constrictorio* partes *fluidas* per *ſolidas* transprimat & quomodo *relatio* harum *partium* ad se invicem tali indicato *constrictorio & relaxatorio* effectu nitatur, de qua re pluribus conferatur D. D. *Præſidis tract. de Anima Part. 2.* Lusus vero *Phantasiæ* est, quando de hac *anima* pro vero ac certo aſſeritur, quod in *diverſis cerebri locis & cameris* *diverſas operationes* mentis exerceat, quasi in *postica* cerebri regione ipsa *memoriæ* functionem adminiſtret, in *medio* cerebri loco *judicium* formet, in *antica* parte *ingenium* sive *phantasiam* exerceat, in qua *contemplatione* multum sane *ludunt*, qui tam *certainas sedes* supponunt & de eo *dubitant*, quasi non *anima in toto cerebro* has operationes exequatur; tanto magis & *lusus & abusus* *phantasiæ* committitur, quando *anima* in tam *arctam sedem*, velut

glan-

glandula pinealis est, immittitur & incarceratur, quasi hæc sit *centrum* cerebri, in quo necessario anima *essentialiter* residere debeat: *usus* contra & exercitium *phantasie* est, quando cum *solidis* rationibus demonstratur, quod anima *essentialiter* in *cerebro* existat, e quo in *reliquum corpus* motus suos *effundat* & reliquis partibus *communicet*: *usus* etiam rationalis & in reliqua philosophia *utilis phantasie* est, quando observatur & indicatur, quomodo in *peculiaribus* casibus sese hæc anima & *essentialiter* & *virtualiter* dividat tali quidem *divisionis modo*, qualis suo *subjecto* competit: *abusus* vicissim *phantasie* est, quando ex qualitatibus *divisionum physicarum*, quidam *divisionem anime* negare & refutare non erubescunt, adeoque *discretas ideas* crasso modo *confundunt*: *licitus* & *utilis usus phantasie* est, quando illustratur & significatur, quomodo eadem anima *rationalis* in *corpore* tanquam in ergastulo suo *occlusa* sit, quod pro *lubitu* suo egredi & *deserere* haud potest, unde etiam liquet, quomodo in hac circumstantia principium quoddam *incorporeum* cum *subjecto corporeo* communem quandam qualitatem habeat, quod videlicet in *materia* contineatur & *materialibus* terminis & limitibus circumscribatur: perinde genuinus & *proficiuus* *usus phantasie* est, quando inquiritur & demonstratur, quomodo anima *rationalis* in & cum suo corpore sentiat, quomodo talem sensum partim pro emolumento *functionum vitalium*, partim pro commodo *moralium actionum* administret, quando mediantibus *nervis* certus *tensionis* gradus per corpus communicatur & propagatur, è qua *alteratione* diversa, a *variis materiis* illata, ad necessariam talem sensationem *formalis* causa suppeditatur; qua ratione hæc anima in *diffitis* corporis locis & partibus percipit; quæ ipsi vel *grata* vel *adversa* sunt; ad quam considerationem spectat illa in *Theoria medica* utilis & rationalis *com-*

menda-

mendatio *sensus vitalis*, quo natura *subtiliter* in corpore percipit, quæ *fructuosa & perniciofa* sunt.

§. V.

Ad ejusmodi eximios *Phantasiæ lusus*, contribuit conciliatio & applicatio *Microscopiorum* ad *internum* corporis animalis scrutinium; etenim dum animus sibi *mira* promittit quando *Microscopia* in usum trahuntur, ita sæpe contingit, ut *ante* institutam talem indagacionem *phantasia* illas ideas afferat, *quas deinde* per *microscopium detectas* fingit & credit, hinc caput antea cum ejusmodi *spectris & phantasmatis* oppletum est, quæ cum *microscopio* inquirere & invenire sperat: sicut illi qui *spiritus* supponunt & contumaciter defendunt, quando cum *microscopio* tales *spiritus* detegere volunt, mox tales *invenisse* gloriantur, quando vel exilissimam aliam materiam conspexerunt: tales ex eadem *phantasia* meros *spiritus* observant, æque occæcati, ac si quis cum nudo oculo solem intuetur & deinde quorsum oculum dirigit, semper discum solarem conspicit: tam *lepidam* & *petulantem* enim est *phantasia*, ut facile sibi quicquam *præfiguret*, quod tamen *realiter deficit*, unde in *venacula* dicitur, man könne sich leicht etwas einbilden; was nicht ist! muß man sich einbilden: tam multifarius est *phantasiæ lusus*: *abusus & lusus* *phantasiæ* est, quando cum iisdem *microscopiis* inquirentur *figuræ* exilissimarum molecularum in *massa sanguinea* oberrantium, an sint *triangulares*, an *quadrangulares* an alterius *figuræ*: *lusus* *phantasiæ* est, quando *pilorum & pororum* qualitates cum *microscopio* investigantur, quæ indagatio licet quidem *vera* esse possit, tamen *necessaria* utilitate *destituatur*, ut adhibita *industria & curiositas*, præter nudam *scientiam nihil* emolumenti promittat; quo *curiosus* enim *veritas* proponitur, eo certius illius *simplicitas & sinceritas* pervertitur: *lusus & abusus* *phantasiæ* est, quando

eadem

eadem *microscopia* applicantur ad conspiciendos & detegendos *vermiculos* in *sanguine* & *semine*, ubi adhuc tam insignis *disensus* inter *phantasias* occurrit, ut unus *caudam* pro *capite* declaret, alter *contrariam* sententiam defendat; inde oriuntur *tot vermiculi capitati, caudati, oculati, hirsuti, polypedes, melampi* &c. in qua sententia *ridicula* phantasie figmenta occurrunt & uti in vernacula dicitur, man sehe ein Kalb vor eine Kuh, eine Maus vor einen Elephanten / eine Fliege vor ein CAMEEL an / sic in hoc studio *videndi* & *figendi* contingit, ut *meri* inde supponantur *vermiculi*, quicquid *figuram* quandam habet: inde oritur *periodus vermium* inter philosophos, Medicos & Medicastro: quicquid accidit, *vermibus* adscribitur: hinc illæ *Theoriæ verminosæ*! quæ in homine *seminarium vermium* statuunt: quo illud applicari potest, quod nonnulli eloquuntur, quando cadaver definire volunt, quod sit *CARODATAVERMIBUS*, uti *Casp. Sagittarius* in *notis ad Sulpicium* fecit: & quantus non committitur *lusus* & *luxus* cum illa *phantasia*, quando per admirandum velut *mysterium* quidam asserunt, quod in *spermate* reperiantur vermes: quales *steriles* vermium *investigatores* & *visitatores* cum hoc invento *nihil utilitatis* producunt, nisi per eundem phantasie *lulum* & *luxum* aliquam utilitatem *effingant*: neque quidem condigne satis demonstrari potest, an æque *id*, quod per *microscopium* conspicitur, *semper talis* pisciculus, aut *vermiculus* sit, an non *phantasia* sibi tale corpusculum sub specie vermis *præfiguret*; tales enim *fascinationes* committit phantasias, ut *portentosa* figmenta generet: & si tales *vermiculi revera* in tali liquore reperiantur, tunc adhuc *rationalis* demonstratio desideratur, an iidem ad illius humoris *essentiam* spectent, an vero ex *accidenti* superveniant, quod *posterius* *facilius* confirmari poterit: vid. *Nicolaus Andry de genesi vermium in corpore humano*; interea talis opinio *fæctus phantasie* est: est subinde *lusus phantasie*. | quando me-

C

dianti-

diantibus talibus *microscopiis* investigantur *vasa minima* & *glandule minutissime*, qualia inventa perinde *inutilia* sunt, nisi quadantenus *superfluum* scientiam anatomicam augeant & memoriam onerent : exinde iterum facile liquet, quam *otiosus* & *infructuosus* ille labor sit, qui talibus negotiis impenditur : porro *lusus phantasiæ* est, quando cum *microscopiis* inquiruntur corpuscula *bullulosa*, *excavata*, *abusus* vero est, quando *fiuntur radiantia*, inde enim oriuntur talia tormenta & *monstra theoriarum*, quæ omnem *distinctum*, *verum* & *sincerum* conceptum fugiunt, ut præter verba nihil realitatis remaneat, quales *intricatæ* theoriæ deinde *veritatem* magis opprimunt : denique *lusus phantasiæ* est, quando *globulorum sanguineorum* tanta inter medicos occurrit æstimatio, quasi illa *admiranda* sit sapientia, quando scimus, sanguinis particulas esse *sphæricas* : hinc declamantur illæ *coloratæ* theoriæ, quasi hæc notitia multum inserviat ad concipiendam & intelligendam *mobilitatem* sanguinis : exinde enim sequeretur, quod *omnium humorum* particulae sint *globulosæ* ! quasi vero aliæ particulae *subtiliores* non eadem promptitudine moveri queant, licet non sint *rotundæ* ? sufficit, si *subtiles* sunt : sed quanta quæso a *præjudiciis* libera emergit *utilitas*, si scimus sanguinem ex ejusmodi globulis constare ? an non hæc meditatio multis *aliis lusibus* imo *abusibus* phantasiæ viam sternat, dijudicet, qui vult : *conf. Hockii Microscopia : A. N. C. dec. 1. an. 1. obs. 13. & in app. p. 3. & 4. an. 2. obs. 27.*

§. VI.

Abusum Phantasiæ prodit, quando in *Anatomico* studio ad *vasa nondum detecta*, *mente* tamen concepta, provocatur, quotiescunque *sententia* quædam in theoria medica assumitur & defenditur, quæ tamen solidis *rationibus* & *experimentis* destituta est, in quo *defectu* nonnulli talia *fiunt* & per subsidium *phantasiæ* supponunt, quæ aliquo modo

do *colorandæ* huic sententiæ inservire poterunt : unde etiam illæ *frivolæ exclamationes* innotescunt, quod multa adhuc in rerum natura deprehendantur, quæ *nondum detecta* sunt, adeoque ex hoc fundamento *excogitant*, quicquid in *phantasiam* cadit : specimen hujus foetus, ex phantasia provenientis est, quando ab *antiquioribus* talia vasa excogitata sunt, per quæ liquor ille in *splene* suppositus intra *ventriculum* transvehi dicitur : secundum *recentiores* sermo incidit, de *vasis e ventriculo* in *renes* abeuntibus & potum huc vehentibus, adeoque *secretionem & excretionem urinæ accelerantibus* ; insignis vicissim phantasiæ abusus est, quando nonnulli a *particulari* ad *universale* concludunt & *universalem anastomosis* supponunt, illa consideratione *inducti*, quia in *nonnullis* partibus talis *mutua* vasorum inosculatio observata fuit, ergo in *omnibus* vasis sanguiferis eadem ad minimum *concepitur*, licet propter *teneritudinem* suam conspici haud possit ; quoniam vero sibi hac ratione phantasia faciliorem *circulum* sanguinis ex *venis* in *arterias* concipit, ita etiam existimat, quod sanguis per has *invisibiles* anastomoses progredi queat : & quo hæc opinio magis *adumbratur*, producitur illud *commune* experimentum, quasi per nonnullas arterias liquor transfusus in proxime adjacentes venas progredi observetur, ergo concluditur, quod *hac ratione* sanguis etiam progrediatur, neque tantum in *uno & altero* loco, ubi vasorum sanguiferorum *farrago* adest, sed etiam in *toto* reliquo corpore : an vero tales deliberationes, *opiniones & conclusiones* non mereantur *abusibus* phantasiæ adscribi, facile quisquam judicare poterit : grandis porro *lusus* imo quandoque plane *abusus* phantasiæ est, quando *fabrica corporis humani mechanica* nimis *curiose* delineatur & ad *varios effectus vitales* applicatur : ubi quidem *minime* negamus, quod ad *diversos* actus & effectus *vitales* ex parte *mechanica* corporis dispositio contribuat &

quod in tali processu harum actionum agnoscendo & concipiendo etiam *legitimus* usus phantasie non parum utilitatis contribuat, quando vero ex *incongruis assimilationibus* præceptis & incompta applicatio ad corpus vivum instituitur, tunc gravis aliquando *abusus* cum phantasia committitur: v. g. quando ex vario usu *antliarum & siphunculorum, tubulorum & canalium* adscensus & descensus *aquarum* demonstratur & confestim applicatio ad *circulum sanguinis* & motum *cordis* formatur, quasi in corpore humano partes & reliquæ circumstantiæ ita comparatæ sint, ac in aliis & interdum *coactis* experimentis negotium succedit; quis non credat talem esse *abusum* phantasie in medicina theoretica, *conf. Hambergeri disput. de DEO ex inspectione cordis investigato, Camerarii disp. subsidia pro arte medica ex antlia pneumatica: A. N. C. dec. 1. an. 9. & 10. obs. 1. de statua humana circulatoria: Nicolaus a Wassenæ hist. tom. 5. ad an. 1623.* ad quales theorias ex antiquioribus inter alios viam monstravit *Archimedes libris de æqui ponderantibus & de humido insidentibus*, quo pertinent e posterioribus *Galileus de Galileis, Torricellus, Paschalius, Gassendus, Cartesius, Boyleus, Newtonius, Hugenius, Borellus* multique alii: & *Lipsius lib. 1. poliocr. dicit: machina græcis est μηχανή, παρὰ τὸ μῆδος, ab inveniendi aut sapiendo*, quare nonnulli scriptores latini machinas vocarunt ingenia & mechanicos appellarunt *ingeniarios*: quo spectat, quod *Asconius Pedianus* professus est, *machina est, ubi non tam materiæ, quam ratio artis & ingenii ducitur*, & uti *Charletonius exercit. 3. de galaxia p. 42. ait: philosophorum mos est, cum rem ipsam uti se habeat, clare percipere nequeant, fingunt saltem modum ejus aliquem naturæ operibus consonum.*

S. VII.

Minimè tamen propterea celebrem doctrinam *Mechanicam* contemnimus, sed tantum prudentem illius applicationem

tionem desideramus & commendamus ; communis enim ille mos, quo speciosa & curiosa quædam experimenta & phenomena promiscue & crinibus ad corporis humani vivi considerationem trahuntur, ad foedos illos phantasiæ abusus pertinet : interim quandoque utilis phantasiæ applicatio in hoc studio valet, quando ex simplici indagatione mechanice fabricæ ille modus ac processus inquiritur, quo functiones vitales & naturales perficiuntur ; etenim citra hanc mechanicam dispositionem æque minus anima humana interna viscera movere posset, ac in externo corporis systemate actuando & dirigendo delinqueret, si eadem constitutio mechanica deficeret : ex hac enim notitia qualitatum mechanicarum fuit illa præfiguratio, quomodo sanguis per cor moveatur, quomodo pulmones expandantur, quomodo sanguis sub suo transitu per pulmones subtilior reddatur, quomodo massa sanguinea per partes fibrosas mediante motu tonico transpressa & fluidior & floridior evadat, quomodo molecule sanguinis & progressivo & intestino motu agitæ, ad se invicem allidant, inter fibrillas conterantur, interdum etiam divellantur, in subtiliores partes dividantur, dissolvantur, in serum convertantur, quomodo tales subtiliores particulæ alias crassiores & mixtas adhuc sanguinis molecules invadant, ingrediantur & sub motu continuante etiam diffindantur, quomodo tali ratione abundantia sanguinis minuatur, sed major seri copia generetur, quod cum copiosiori diaphoresi & diuresi excernitur, quod utramque talem excretionem reddit magis olidam, magis tingentem & saturatam ; quomodo præsentibus talibus subtilibus substantiis in massa sanguinis motus intestinus succedat, quomodo iterum aliæ pingues & terreæ molecule conjungantur & hac mixtione sanguinis moleculam forment & constituent: quomodo sanguis efficacius impulsus, magis se expandat, majus spatium oppleat, partes turgesciat ; quomodo sanguis in

arteriis fluidior & floridior, in venis vicissim crassior evadat; quomodo sub efficaciori transitu sanguinis per partes porosas sive fibrosas, adherentes materiæ subtiles pravæ successively abstergantur & ad faciliorem excretionem præparentur, qui actus coctionis in febris tali modo succedit; quomodo sanguis in & per partes diutius, sed fortius transpressus, denique fibras distendat, ut atonia sive laxitas fibrarum consequatur, adeoque torpor corporis & delassatoria molestia in membris percipiatur, testimonio plethoricorum; quomodo sanguis refluxus per venas proprimatur ne retrolabatur; quomodo valvulae in venis hunc relapsum præoccupent; quomodo sub efficaciori partium carnosarum, tunicearum & cutanearum constrictione venæ comprimantur, ut sanguis in illis evanescat & venæ concidant: quomodo secundum fabricam cordis, valvularum, situm arteriarum & venarum concipiendus sit circulus sanguinis, quomodo progressus sanguinis per Venam Portæ ea propter difficilior sit, quoniam ex multis ramis in brevem illius venæ truncum copiosus sanguis simul confluat; quomodo secundum fabricam ventriculi cibi ingerantur, ingesti digerantur, digesti egerantur, egesti ad varios usus congerantur & destinentur; quomodo sub motu fermentativo in ventriculo & intestino duodeno resolutio ciborum contingat; quomodo promotio chyli & lymphæ in sanguinem succedat; quomodo nimius infarctus ventriculi obruat & opprimat diaphragma indeque cordis motus & respiratio impediatur; quomodo flatuum genesis eveniat, ut expirantes humiditates partes excavatas distendant & simul aliarum partium functiones pervertant; quomodo regurgitationes sanguinis ab una regione in alteram fiant: quomodo primis viis constrictis sanguis magis in superiores partes regurgitet; quomodo sanguine in inferiores regiones provocato & invitato, deinde superiorum regionum afflictio minuatur: quomodo in multis casibus negotium

gotium cum consensu motuum & partium constitutum sit; quomodo ob minorem sanguinis motum & insufficientem corporis internam humectationem & fluidæ & solidæ partes exarescant & immobiliiores reddantur; quomodo sub insolita alvi obstructione multæ impuritates in massam sanguineam reorbeantur, adeoque successive cacochymia generetur; hisce & pluribus aliis speciminibus jam indicavimus in quantum phantasia ex notitia corporis mechanica ita fructuose exerceri & applicari queat, ut theoriæ medicæ veritas & certitudo promoveatur.

§. VIII.

Quamvis hucusque varia specimina usus, lusus & abusus phantasiæ in medicina theoretica proposuerimus, tamen pauca adhuc præcedentibus considerationibus annectere lubet: quid Chymia contribuat, ad evolutionem diversarum causarum & formandum conceptum de variis rerum mutationibus, ipse usus ingenuus docet; ubi ipsa phantasia se exercet, quo nonnulla phænomena clarius comprehendere queat & spectat huc exacta notitia combinationis & dissolutionis sive syncriseos & diacriseos, debita cognitio relationis materiarum ad se invicem: exinde fluit præfiguratio de genealogia salium in corpore humano, de processu fermentationis & putrefactionis, de specialissima conservatione corporis mixti, de habitu mixtorum & aggregatorum ad motum, de principii sulphurei activitate ad destruendum corpus, de aquei principii relatione ad inferendum damnum & commodum, de caloris efficacia in actu combinationis & destructionis, de actione subjectorum salinorum & sulphureorum in partes corporis fluidas & solidas, de relatione pinguium materiarum ad diversa salia, de fermentativa alteratione corporum mixtorum salinorum, sulphureorum & pinguium, de capacitate subjectorum valde subtilium ad dissolutionem aliorum corporum mixtorum &c. quæ singulæ scientiæ chymicæ adeo adjuvant

*juvant theoriā medicā, quo conditio alterationum, in corpore vivo obviarum, paulo clarius concipi præfigurari & explicari queat; ubi tamen iterum cavendum est, ne hic usus in abusum convertatur & omnes processus in chymia ob-
vii, minus apposite ad corpus vivum applicentur: lusus phan-
tasie est, quando ex uno & altero effectū, mox frequentia mor-
bide cujusdam afflictionis urgetur, v. g. quoniam interdum
obstructiones & incarcerationes sanguinis in partibus fibrosis,
cribrosis & vasculosis contingunt, hinc obstructionis accusa-
tio tam frequens in schola medica est, quæ tamen sua actua-
li frequentia illi accusationi minime respondet & sane æ-
gerrime constitutum esset corpus, si tam frequenter obstruc-
tionibus subiectum esset, unde hæc phantasia admodum
claudicat, si conciliatur periculosus obstructionum status,
cum illa invisibili anastomosi vasorum, cujus in præcedenti-
bus mentio facta fuit, ut ex hac imaginatione per necessitatem
quandam absolutam sequi deberet, ut non modo obstructio
in omnibus hominibus indies contingat, sed & ut numero plu-
res obstructiones simul orirentur, propterea mirum esset, cur
tam diu corpus humanum perdurare queat: inde porro li-
quet, in quas confusas & rationi & observationi contrarias asser-
tiones talis lusus & consequens abusus phantasie seducere
queat: conf. Excell. D. D. Stablii disp. de obstructione vasorum
sanguiferorum: eximius porro abusus phantasie est, quando
consuetæ secretionēs ad œconomiam vitæ animalis spectan-
tes adscribuntur figuris pororum in organis colatoriis & ma-
teriarum secernendarum, nec non convenientiæ inter illos &
has; ubi primo supponuntur certæ tales figuræ in poris & ma-
teriis, de quibus deinde asseritur, quod per rotundos
poros sphericæ materiæ progrediantur, quod triangula-
res poros, triangulares materiæ ingrediantur & ita
cum reliquis figuris; sed cum hanc phantasiam alibi Cele-
berrimus D. D. Stablius in programme de paralogismo pro-
portio-*

portionis figura pororum secretiorum solide detexerit & refutaverit, sufficiat etiam illam hoc loco brevibus indicasse: *conf. Pitcarnii Elementa Medicinæ Physico-Mathematica & Craanen tr. de homine*, ubi de hac consideratione tractant; alius *lusus phantasiæ* occurrit, in ejusdem *modi secretionis* evolutione, quando ad *imitationem* speciei differentis *fermentationis*, dum una *vinosa*, alia *cerevisiaria*, altera *panaria*, quædam *sacharacea & mellaginea* est, in corpore *varia fermenta* specifica finguntur, quorum *unum* in *hepate*, aliud in *renibus* & sic porro per reliquum corpus dispersum & divisum est, ut propterea in *hepate tales*, in alia parte *aliæ* materiæ motu tali *imaginario fermentativo* separentur: qualis *lusus*, sed insuper etiam *abusus phantasiæ* committitur, quando ex *differentia fermentorum*, *diversi morbi* supponuntur, quorum *unus* hanc materiam peccantem tanquam inutiles fæces, *alius aliam* separat & ejicit: non minor *lusus & abusus phantasiæ* committitur in indagatione *materiarum morbificarum*, dum nonnulli illis *certas figuras*, *cuspides*, *aculeos*, *uncos*, alii *certos sapes* & *potentias stimulant*es imputant, quidam *fixas*, alii *volatiles*, aliqui *acidas* nonnulli *alcalinas* &c. esse reputant; in quo scrutinio verò *plurimum* inutilis phantasia occurrit, quando adeo *operose* in talem *incertam* evolutionem materiæ *peccantis* inquirunt & tamen cum *omni* tali theoria semper in *dubio* hærent; *talis* enim indagatio potius *impedit* veritatem & *certitudinem* medicam, variisque *contrarietatibus* obnoxia est; neque quidem hæc investigatio materiæ *morbosæ*, adeo promiscue instituta, ullum *solidum* subsidium affert, quo *meliori ac certiori* successu in *therapia* medica *morbis* illis *subjugandis* satisfacere queamus: *Quantus lusus & abusus Phantasiæ* in arte *Prognostica* passim obtingat, vel titulo ad minimum hoc loco notare placet; inter alia vero talia specimina provocamus ad illam effoeminatam observationem, quando nonnulli ex *Albumasare in principio introductorii & Avicenna fen. 21. lib. 3. tr. 1. c. 17.* ex fu-

niculo umbilicali hariolari volunt, an futura conceptio masculum an feminam promittat, dum nodi rotundi aut (prout *Spigelius de formato fœtu c. 2.* eandem fabulam carpit) ruffi, masculos, oblongi vero aut albi foeminas, defectus vero nodorum in eodem funiculo umbilicali plenariam sterilitatem futuram significare debent; quales abusus Phantasiæ etiam admodum reprehendit *Villalpandus lib. 1. magicæ divinat. c. 24. conf. Casp. Reyes Camp. Elys. qu. jue. qu. 52. an ex nodis seu tuberculis vasorum umbilicalium possint obstetrices prædicere filios, quos postea mulier paritura est*: Et quis quæso enarret singulas illas phantasias, quæ sicut in omni *Scientiarum & artium* foro, ita etiam in *Medicina* occurrunt: placuit tantum hisce pagellis velut in *specimine* nonnulla exempla *usus, lusus & abusus phantasiæ in theoria medica* proponere & ad ulteriorem hujus considerationis enucleationem ansam præbere.

§. IX.

Nunc in ordine nonnulla *Specimina ejusdem usus, lusus & abusus Phantasiæ in Medicina Practica* allegabimus, quo thematis præsentis utilitas in foro *Practico* etiam inclarescat: vulgo à Medico desideratur, quo *medicamentorum* modum *operandi* intelligat, neque quidem hanc notitiam spernimus, modo *inutiles imaginationes & conceptus* vitentur: etenim *remedia* habent aliquam *actionem* in *corpus* substratum, quæ tamen ab effectu *medicamentoso* probe distinguenda est, uti hanc animadversionem *D. D. Præses* fusius explicavit in *tract. de medicamentorum modo operandi in corpore vivo*: usurpatur itaque *phantasia* cum *emolumento scientiæ*, quando inquiritur, *quomodo vomitoria, purgantia, diaphoretica, diuretica, adstringentia, rubefacientia, emollientia, incidentia, abstergentia &c.* operentur in *partes fluidas & solidas*, *quomodo motus* provocent, *quomodo materiam* afficiant, *quomodo sensum* excitent, quæ sit actio *medicamentorum in corpus*, quæ sit reciproca actio *animæ in medica-*

medicamenta, in hisce contemplationibus multum & cum fructu se exercere potest *phantasia*: interim etiam in eadem disquisitione multus *luxus*, *lusus* & *abusus* cum *phantasia* exercetur, quando iterum variæ *figuræ* in particulis supponuntur, quando varia *fermenta* & *effervescentiæ* statuuntur, quando *spirituum* influxus in consensum ducitur, quando diversæ *vires motrices* excogitantur, quando multiplices *nisi* & *reactiones* in *materiis* accusantur, quando *incogniti archei* concursus satis obscurus allegatur &c. quæ singulæ speculationes satis sæpe ad eximios *abusus* *phantasiæ* disponunt: & heu! quanti tales *abusus* occurrunt in *Uroscopia*, ut propterea hoc artificium ex *urina præsagiendi* in contemptum tractum sit: quantas *phantasias* interdum *chymici* cum *urina* committant, multa exempla comprobant; quidam certa *salia*, alii certa *sulphura* inquirunt, nonnulli *vermiculos* cum *microscopio* investigare contendunt, aliqui *catellos* in *urina* observasse affirmant & quidem in *urina hydrophoborum*, quam *phantasiam* *Avicenna* *fen. 64. tract. 4. c. 7.* *Abenzoar. lib. 1. Theisir. tr. 9. c. 6.* *Nicolus Florentinus Serm. 4. tr. 4. c. 15.* proponunt, *conf. Casp. Rejesius Camp. Elys. qu. 62.* *Zac. Lus. M. P. H. lib. 5. hist. 14.* *Sennertus Institut. lib. 2. part. 3. Sect. 2. cap. 4.* quales aliàs *abusus* *phantasiæ* in *Uroscopia* occurrant, indicarunt *Forestus de incerto ac fallaci urinarum iudicio*, *A Castro in Medico Politico lib. 3. c. 11.* *Casp. Rejes. l. c. qu. 49.* *Savonarola lib. de urinis c. 1.* *Bohnius de offic. med. duplic. Part. 1. c. 8.* *Fuchsius institut. med. lib. 4. Sect. 3. c. 1.* ubi elegans *epicrisis*, quam *Rejesius l. c. n. 29.* allegat, continetur; *A. N. C. Dec. 2. an. 4. obs. 96.* *Robertus de Fluctibus de divinatione per urinam*: quo loco placet commendati *Rejesii* locum recensere, qui in *qu. 49. n. 28. p. 618.* ubi illam quæstionem ventilat, an ex *urina* *ingravidatio* prædicari potest, differit: *quæ si non mere nuga, inutilis certa & evanida arrogantæ chimæ sunt, quæ somniatoribus ægyptis magis conducunt,*

dum stultum populum ex lotio quidvis ariolantes in admirationem trahere & emungere student; ni malis logiatros etiam quosdam medicos, ut feminis prolem anxie desiderantibus complaceant, futili hoc mendaciolo illas in optatam spem erigere, ut adapertis marsupiiis liberalius tanta felicitatis augures remunerentur: Utitur vero etiam Medicus in Praxi Phantasia ægrotantis & quidem congrue & fructuose, quando huic ad desiderium suum morbum ita describit, ut de eodem perspicuum impetret conceptum, ne falsa imaginatione morbum sibi deteriore & periculosiorem præfiguret, neve ultro animo valde ægrotare & afflictus esse debeat, id vero fiat sine otiosa loquacitate: Medicus enim loquax alter aut novus est morbus: juxta versiculum Menandri: Medicus loquutor, morbus ægrotis novus; neque ægrotantibus morbus ex Philosophia Cartesiana describendus est, conf. Lentilius Fatromnematibus p. 591. quare prudens artifex in omni casu ita ægrotantis phantasiam tranquillare debet, ne illa reliquam salutarem medendi methodum turbet & offendat: interdum enim aliqua ex parte patientes in animo quietiores evadunt, si morbi sui indolem intelligunt, hæcque in corpore suo experiuntur, quæ medicus de eodem prædicat, inde in animo eriguntur, dum certi redditi sunt, quod artifex hunc morbum exacte cognoscat: quando vero patientes in phantasia sua dubii & anxii manent, tunc semper decursum morbi sibi deteriorationem præsentant, fingunt, metuunt & eo ipso etiam deteriore reddunt: minime vero propterea decet phantasia ægrotantis abuti & illam in periculosis morbis adeo corrumpere, ut gravitas morbi magis accrescat & increbescat: haud enim consultum est, vel nimis timidum & anxium, vel nimis securum reddere patientem; ad utrumque & medici & ægrotantis phantasia contribuit, quare utriusque justa applicatio & directio commendanda est.

§. X.

Ludunt insuper nonnulli & *abusum* committunt cum *sua* & *ægotantis phantasia*, quando posthabita *vera morbi* indagatione, quoad *causam* suam *genuinam* & *subjecti qualitates*, mox *cordis præservatio* suscipitur & promittitur, man-
 wolle das Herz verwahren / oder stärken : dum enim vulgo
 cor pro *principalissima* parte æstimatur, ita facile sibi homi-
 nes persuadent, quasi res optime gesta & tractata sit, quan-
 do *corroboratio* tentatur; sub hac enim imaginatione & per-
 suasione interdum *optimum* negotium *negligitur*, ut dehinc
causa morbi adeo *accrescat*, ut cor etiamsi *robustum* reddi-
 tum sit, pro illa *expellenda* haud valeat: quare illi, qui tam
 multam spem in cordis roborationem collocant, multum
 etiam *phantasiæ* inserviunt: idem lusus & abusus est, quan-
 do *sanguinis refrigerationi* & *edulcorationi* quidam adeo stre-
 nuam operam dant, ut hanc *principalem* indicationem me-
 dendi methodi esse sibi persuadeant: man müsse das Ge-
 blüt anfrischen und versüßen: dum enim sanguis valde *æstuo-*
sus & *acris* multis *morbidis* effectibus concitandis quadrat, ita
 facile *creduli* & *phantasiæ* inhærentes patientes huic per-
 suasioni medici annuunt; hinc *populus* jam per talem phan-
 tasiam ita *corruptus* & occæcatus est, ut nil nisi talia admi-
 nicula a medico dissideret: idem valet de sanguinis *spiri-*
tualsentia concilianda; nam cum *spirituum* vox in phantasia
 medicorum & ægrotorum admodum *venerabilis* sit, ita ad
 talem obscuram & *metaphysicam* confugiunt *spiritualsentia-*
am; quemadmodum ipsa *spirituum* doctrina medica foetus
corruptæ phantasiæ est & si *spirituosa* remedia ad hanc *spiri-*
tualsentiam conciliandam applicantur, tunc illorum effe-
 ctus, *vere medicus*, longe alius est, si *phantasiæ* titulos vita-
 mus, ac quidem sanguinem spirituosum reddere debet:
 valet interim in hoc conatu medico magna & vana phan-
 tasia; similem censuram meretur, quando nonnulli medici
 ad *numiales balsamicas* virtutes provocant & male propter-

ea concludunt a *balsamica* qualitate *mumiarum* ad corporis adhuc *vivi* durationem promovendam ; *alia* enim balsamatio competit *cadaveri* , *alia* corpori *vivo* : indulgendum quidem interdum est *phantasie* *ægrotantis* cum *salutari* successu, quando ille talia *confortantia* , *nervina* , *corroborantia* seriose postulat, tunc artifex nonnunquam sub hac phantasie cura, finem illum impetrat, ut magis magisque *reficiantur* patientes, cum ipsorum *desiderio* satis fecerit medicus : *ridicula* omnino phantasia est, quando ad *præcordia* sive regionem cordis externam talia *cordialia* aut plane frustula panni scarlatino colore tincti figuram cordis æmulantia applicantur, sub illa persuasione & *imaginatione*, quasi eo melius inde *roboretur cor* , siquidem *intrinsecus* delitescens cor, *parum* de tali remedio cordiali *sentit* & si quæ roboratio etiam *consequi* videatur, illa vel ex phantasia nata, vel per *odorem* suaveolentis remedii cordialis adhibiti provocata est, quod etiam valet de illis pulvillis, qui *pulsibus* apponi solent ; sub quo artificio multa phantasia latet, in quo negotio interdum medici *phantasie* *ægrotantium* obtemperare debent ; licet enim hæc remedia, *odori* grata, ipsis pulsibus nullam notato dignam utilitatem afferant, attamen dum *odorem* *reficiunt*, simul *aliquem* nervinum aut *roborantem* effectum post se relinquunt : Phantasie interdum *legitimus usus* conceditur, quando prudens artifex sibi *bonam fiduciam* in ægrotante acquirit ; ubi *accepta* & amabili *conversazione* & officiositate eidem succurrit, ipsius *animum* cum temperata & tranquilla *spe* erigit, quantum fieri potest ipsius voluntati & *beneplacito* auscultat ; *abusus* contra cum phantasia committitur, quando cum *effæminata* officiositate & garrulitate, *novitatum* commemoratione, *accelerate* sanitatis promissione & similibus actionibus sibi talem fiduciam comparare studet : quid quod *ludunt* & *abusum* cum phantasia committunt, qui garrulis *mulierculis* placere earundemque *favorem* & *commendationem* acquirere gestiunt :

unt: illi enim medici has lepidas mulierculas mediante *phantasia* captant, & hæ illos iterum cum multa *phantasia* commendant: *conf. Bohnius de offic. med. dupl. Part. 1. c. 4.* quin ipsi etiam multum *ludicræ* *phantasiæ* serviunt, qui cum *odorum* ægrotantibus *adversis* se jungunt, cin Medicus soll nicht nach Urzneyen riechen / varii enim homines inde in *deteriorem* statum delabuntur, unde facile quisquam ex *odore*, quod *medicus* sit, *dijudicari* potest; dum enim cum *suaveolentibus* se commendare vult, male distinguit inter *sanum* & *ægrotum*, siquidem *priores* *melius* ejusmodi odores perferre possunt; quare varia inter observatores occurrunt exempla, quomodo tali modo inuncti medici diversos *sinistros* effectus hac sua *adversa* expiratione excitarint; quare *Hippocrates* quidem a medico desiderat, quod *gratum* odorem spirare debeat, haud vero *adversum* & *suspectum*: quæ consideratio illos etiam attinet, qui instar extracti *tabaci* fœtent.

§. XI.

Est porro *lusus* *Phantasiæ*, quando Medici remediorum *utilitates* ex diversis *signaturis* & *characteribus* arcessunt, ubi primo in variis *herbis* per *imaginationem* varias *figuras* partibus corporis analogas sibi *representant*, deinde vi hujus *phantasiæ* judicant, quia hæc herba hanc partem *præsentat*, ergo huic parti *mederi* debet, qualia falsa encomia facile per ipsam horum remediorum applicationem produnt, quantum in hac theoria valeat *phantasia*: etenim *externa* illa assimilatio nondum evincit *certitudinem* horum encomiorum: Et quæso! quot non *lusus* & *abusus* *Phantasiæ* in *Materia Medica* vulgari occurrunt, quales quadante-nus recensuit D. D. *Præses in Disput. de Dubiis vexatis materiæ medicæ*: paucis tantum aliqua *speciminis* loco in medium proferre lubet: in titulo & classe remediorum *sterilitatem* curantium heu! quantæ non *stupendæ* innotuerunt *phantasiæ*? ibi mox *testiculi equi, tauri, boedi, galli gallinacei*

nacei commendantur, ob nullam aliam rationem, quam quia hæc animalia *lasciva* & *fecunda* sunt: in titulo *partum promoventium* remediorum laudatur uterus *suis* & *leporis*, quia hæc animalia non modo *polytoca* sunt, sed *facile* pariunt! in titulo *antiphthysicorum* cum eximiis elogiis exoriantur pulmones *vulpis*, quia vulpes *celeri* pede cursum suum prosequuntur, propterea neque *asthmate*, neque *phthysi* laborare dicuntur: in fonte *anticolicorum* extolluntur intestina *lupi*, quia hoc animal *rapax* bono & *voraci* appetitu gaudet & alimenta *crassa* facile concoquit, quod fieri non posset, si lupus *colica* vexaretur; laudantur intestina *gallinae*, quia gallinae *lapillos* comedunt: in classe *stomachicorum* & *appetitum* provocantium commendatur interior pellicula *ventriculi galli gallinacei*, quoniam hoc animal *lapillos* ingerit: contra *icterum* laudatur lapis in *vesica fellea* bovis repertus, *stercus anserum*, pellicula *flava* de pedibus gallinarum & anserum, quia *flava* sunt singula: sub numero *antepilepticorum* reperitur *sanguis hominis* detruncati, aut *leporis trucidati*, quoniam *anxii spiritus* in hoc sanguine obvii, alteros *impetuosos* & rebellantes in epilepticis subjectis coercere & *refrenare* debent: omissis pluribus ejusmodi speciminibus: quis vero non facile perspiciat, quanti *abusus phantasiae* in Medica Materia floreat & enutrientur: neque hoc tantum, sed occurrunt etiam *similes* lusus & *abusus phantasiae* in *conscriptione* & *ordinatione pilularum* ratione numeri *imperfecti*, in *formularum præscriptione*, quibus mox hic aut ille *color* conciliatur, mox combinantur *folia auri*, mox *miraculose subscriptiones* annectuntur, quibus qualitatibus *medici* cum sua phantasia etiam *egrotantis phantasia* decipiunt: porro exemplar *abusus* cum phantasia commissi est, quando pulveribus, Tincturis, oleis, &c. titulus *Vitæ* tribuitur, ut eo citius *credula* plebs advolet & vitam pro denario & triobolo emat: quid enim *gratius* & *acceptius* vita? quid commodi-

us quam *unico pulvillo vitam deglutire* posse : *phantasie* ludicræ foetus est , quando nonnulla *arcana* dispensantur , quibuscum medici promittunt morbum vel ad *salutem* vel ad *mortem* dirigere & immutare : ut constant ejusmodi *pulveres vitæ & necis* , quo *jure vitæ & necis* illi etiam superbiunt , qui in medicina *phantasie* student : cum ejusmodi *spuriis* remediis nonnulli illis satisfacere volunt , quibus ægrotantes *longinquiori* suo decubitu oneri sunt : insignes *ausus, lusus & abusus* cum *phantasia* exercentur , quando remedia *universalia* , *Panaceæ* , *Wittel die vor alles helfen sollen* divulgantur & declamantur : laborant illi *phantasia* , qui talia remedia sub hoc titulo *distribuunt* , dum *credulos* homines decipiunt , illorumque crumenas mulgent & sub hac *persuasione* eosdem capiunt : quid enim *compendiosus* est , quam in *unica* specie remedii *omnem* opem & medelam reperire : hinc cum eadem *cæca* *phantasia* interdum ad talem sterilem panaceam præcipites ruunt & quicquid subsidii inde non ex imaginatione impetrarunt , id lepidæ suæ *phantasie, credulitati & præcipitantie* adscribere debent : & quid dicamus de remediis ex *gemma, auro, argento* paratis de *Bezoardicis solaribus, lunaribus & auro potabili* & similibus remediis , annon *multum* in talium remediorum usu etiam lusus *phantasie* intercedat , exploratu haud difficile erit : quare jam *Scaliger Cardani subtilitates* circa *gemmarum* usum excogitatas taxat , uti similem censuram meretur *Boetius a Boot* quando tam mirifice gemmas & diversos lapides extollit : *conf. Sanctor Sanctorius Lib. 8. c. 11. Guido Patinus in not. ad tract. de Peste Nicolai* : quando enim creduli ægrotantes talibus medicis & ex *phantasia* genitis *persuasionibus* fidem dant & ex ejusmodi remediis *sanitatem & vitæ firmitatem* sperant , tunc sæpius illuduntur , quo valet illud *Angeli Politiani lib. 2. epist. ad Nicol. Leonicensem* : doleo generis humani vicem , quod in se grassari tam diu impune tristem hanc *inscitiam* patiatur , atque ab his interdum vitæ spem pretio emat , unde mors certissima proficiscatur : quis enim non videat , plus esse a medico , quam a morbo periculi ? siquidem & morbus alius pro alio curatur & alia pro aliis remediis afferuntur.

§. XII. Ingens & vix excusandus *abusus* Phantasiæ in Medicina *Practica* est, quando Medici tam facile *nasutis* muliercularum consiliis, *persuasionibus* phantasiis & *experimentis* auscultant: quemadmodum enim inter tales mulierculas *monopolium* Phantasia floret, ita facile ab iisdem *medici*, quando *servitiis* foeminarum se dicarunt, iterumque ab his *commendationes* expectant, *seducuntur* & decipiuntur: turget enim & scatet medicina muliercularum phantasiis & *phantasmatibus*: inde innotuerunt tot *fabule*, tot *superstitiones*, tot *credulitates*, tot obsoletæ *relationes*, tot *insomnia*, tot *spectra*, tot *apparitiones*, tot reliquæ *historiarum* & *experimentorum Majorum*, *tritavia*, *atavia*, *abavia*, *Proavia*, *avia*, *matris*, quas prudens Medicus cum eximia patientia auribus excipit & cum silentio comitatur: quicunque vero ejusmodi crepundiis, *nugis* & *gerris* auscultant, facile in abyssum *ridicularum phantasiarum* rapiuntur: quare Poeta tales effæminatos medicos hocce alloquitur versiculo: *nulla quidem vestri tam regula firma Galeni, quam non interdum curva refellat anus*: & in hac circumstantia cum eximia cura *fama* suæ prospicere debet prudens artifex, ne tam *lepidis* phantasiis feminarum, *petulantia lingue* præditarum, aures attentas præbeat, sed potius *sane* & *fundatæ rationi* studeat: non minus cæcus phantasiæ *abusus* est, quando artifex ad talem influxum incogniti & omni fundamenti destituti *fati* provocat; quasi præter *divinam* benedictionem adhuc *alia* causa incognita, *activa* tamen & *humanis* functionibus *præposita* existat, quam vulgo *fortunam* vocant; inde innotuere prædicata de *fortunato medico*, qui character, quantum *solide* rationi conformis sit, a *Rejesio Camp. Elys. qu. 17.* fufius explicatur: nos brevibus indicavimus, quod in hac provocatione ad *fortunam*, multum *phantasiæ otiosæ* & sterili tribuendum sit: evidentia insuper specimina tam *usus*, quam *lusus* phantasiæ occurrunt in curatione morborum per *Sympathiam*, quando de adhibitis *experimentis* patientes firma & tenaci fiducia ac *persuasione* fanitatem deficientem sperant: inde vicissim evenit, ut, qui *tanta* phantasiæ vi non polient, neque interdum *lepidum* quoddam experimentum pro *utili* æstimant, etiam *promissam* efficaciam medicam non experiantur: man muß sich eine Sache gut einbilden können: ita nonnunquam tales *cure sympathicæ* cum *subrili*, interdum vero cum *crassa* phantasia succedunt: ita etiam res comparata est cum *antipathia*, mediante qua interdum *salutares* effectus promoventur, ubi iterum accidit, ut qui

qui de adhibito subiecto sibi non *firmam phantasiā* format, sed potius adhibi-
tum remedium *indifferenter* tractat, neque *extreme* averfatur, illi etiam *talīa* ex-
perimenta *promissā* salubritatem haud afferunt, quare *dubii* & a tali phan-
tasia alieni eloquuntur : wer es auch glauben könnte : wann man nicht glaubt
so hilft es nicht : quando itaque *prudentes* medici interdum pro *suo scopo*, quem
intendunt, *salutari*, in patiente suo talem *firmam phantasiā* provocare pos-
sunt, illi tunc tanto *citius* hunc finem obtinent ; *multum* præterea valet *applica-
tio* phantasiæ in cura morborum *transplantatoria*, quæ in *illis* subiectis facilius
procedit, quæ tale negotium sibi *firmiter persuadent* : quæcunque vicissim *mi-
nus credula* & cum phantasia activa sunt, illis talis cura etiam non *tantum* neque
tam facile de sperato successu quicquam promittit : in *amuletorum* usu, pluri-
mum etiam *usui* & *lusui* phantasiæ tribuendum est, siquidem interdum *lepida*
experimenta ad *medicos* effectus producendos contribuunt, ut mirari amplius
haud conveniat, quomodo *vana imaginatio* tantorum effectuum causa evadat :
huc spectant curationes per *carmina, cantus & verba*, in quibus plurimum eti-
am operatur *phantasia* cum *superstitione* conjuncta : quo pertinet illud *Rejesii*
qu. 22. n. 6. *carmina illa & imagines prorsus sunt inefficacia, irridendique sunt*
illi influxus & virtutis communicatio siderum, in quibus tantam energiam co-
gnoscit *Ficinus & a nullo docto viro probari debent, quin fabulosa hæc sunt con-
tra Dei eloquia pugnant* : spectat huc ille *abusus* phantasiæ qui cum *exorcis-
mis* & profanis morborum *deprecationibus* committitur, in *Bersprechen der*
Krankheiten, aut quando *verbum Dei* in talem *profanationem* ducitur, ut ad a-
bigendos morbos de collo suspendatur, ubi valet illa parænesis *Chrysostomi* su-
per *Mattheum* : *quidam aliquam partem Evangelii scriptam circa collum por-
tant, sed nonne quotidie Evangelium in Ecclesia legitur & auditur ab omnibus ?*
cur ergo in auribus Evangelia posita nil prosunt, quomodo enim possunt circa
collum suspensa servare : deinde ubi est virtus Evangelii, in figuris litterarum,
an in intellectu sensuum ? si in figuris bene circa collum suspendis, si in intellectu,
ergo melius in corde posita prosunt, quam circa collum suspensa.

§. XIII. In *Febribus intermittentibus* quanti *abusus* cum *phantasia* circa
febrisugorum ordinationem committantur, docet fane quotidiana observatio,
ita ut vix *vetula* reperiatur, quæ non tale experimentum sciat ; neque quidem
denegari possunt illi effectus, qui *interdum* desiderio & *spei* respondent, qui ve-
ro ex illa *lepida phantasia* fluunt : quando etiam artifex ejusmodi experimentis
auscultat, *priusquam* reliquas *therapeuticas* operationes commiserit & materi-
am peccantem *evacuaverit*, tunc eadem cum *abusus activa phantasia* macula no-
tanda erunt : interim tamen & *sua* & *agrotantis phantasia recte* utitur, quando

absente & remota materia febrili, *paroxysmi* tamen continuant: inde innotuerunt illæ observationes, man könne sich das Fieber wieder darmit vertreiben, womit man dasselbe sich verurfsachet: quæ tamen experimenta neque sæpe, neque promiscue succedunt & si etiam ad vota contingunt, tunc communiter phantasia nituntur: invigilet vero vicissim prudens artifex, ne in tali cura acquiescat, neve premature illam admittat, neque in excessum illam conjiciat: quicquid enim mediante phantasia immodice administratur, id pessimarum sæpe consecutionum causa evadit: est enim alias phantasiæ energia in motus præceptus atque vehemens: Quantum nonnunquam Melancholici phantasia laborent, docent multiplices observationes practice; in qualibus casibus etiam artifex ipsorum phantasiæ mederi & ingeniosas medendi methodos invenire & applicare debet, ubi medicus cum legitimo usu & lusu phantasiæ, abusui phantasiæ in patiente subvenit, qualia exempla passim recensentur à practicis, ut in *A. N. C. Dec. 1. an. 3. obs. 49.* commemoratur talis cura stratagematica Melancholici. *conf. Reyes. qu. 12. n. 4. Zac. Lusit. Prax. admir. obs. 48. 49. M. P. H. Lib. 1. hist. 36. 37. Tulpus obs. med. lib. 1. hist. 13. 19. 50. Bohnius de offic. med. dupl. p. 87. Part. 1. c. 4. Poggii Facetie, Schenckius, Marcellus Donatus, Nierembergius aliique:* utitur subinde interdum prudens practicus phantasia patientis, quando hic immoderato quodam desiderio ad certum medicamentum, certam formulam, certum alimentum fertur, in quo casu medicus quadantenus huic desiderio auscultans exoptatum salutarem effectum eo citius impetrare potest; caveat vero ne nimium indulgeat ægrotanti, neve laxiori tali regimine magis noceat, quam proficit: enormis etiam abusus cum phantasia committitur, quando varii homines remedia è partibus humani corporis parata, plus æstimant, quam quidem merentur, velut pinguedinem, corium, ossa microcosmi, aut quando vicissim patientes omnia remedia hac ratione averfantur, quoniam fortassis ex cadavere humano parata esse sibi persuadent & uti credula & superstitiosa plebs sibi imaginatur, quasi ex cadaveribus hominum violenta morte & judiciali supplicio extinctorum desumpta sint: quales vanas persuasiones & phantasias medicus prudenter emendare debet, quo tanto facilius ad prosperum & exoptatum scopum pertingat: ingens etiam abusus phantasiæ est, quando homines promiscue medicamenta chymica vel nimium extollunt, vel penitus rejiciunt & utrumque quidem sub varia vana persuasionem, in quo utroque vitio medicus invigilare debet, ne salutari sua intentione destituatur: & quid magis abusum phantasiæ prodit, quam si medici æque ac ægrotantes tam sæpe tamque promiscue morbos ex fascino natos accusare solent; sub qua phantasia sæpe spissa latet ignorantia; hinc morbi complicati, hereditarii, corrupti, transfigurati &

quan-

quandoque diversis medicis *incogniti*, ejusmodi *incantamenti* adscribuntur, ubi *superstitiosi* homines mox mira sibi concipiunt & ad varias occasiones cum le-
 pida *phantasia* colludentes, provocant, unde *fascinationes* illæ ortum trahere
 supponuntur: inde oriuntur illæ *confusiones* inter *effectus naturales* & *supra na-*
tura consuetæ vires contingentes, adeo ut ille *abusus* phantasiæ sit, quando
 singuli *intricati* effectus à *natura viribus* provenientes, inconsiderate *supra-*
naturalibus influxibus adscribuntur, (cujus *abusus* etiam reminiscitur *Clariss.*
D. D. Detharding in docta & prudenti *Dissert. de Obsessione eademque Spuria*)
 nec non quando *alii effectus*, qui à *naturalibus* potentiis provenire non possunt,
 cum multa *ingenii* maceratione, vexa, nec non *lepida imaginatione*, quæ di-
stincti conceptus & manifestæ demonstrationis vices tenere debet, mere *natu-*
ralibus causis imputantur & cum *ridicula philosophia*, tanquam *eximii* judicii
 foetus explicantur, imo verius mediante *petulante phantasia* implicantur; quas
 fabulas propterea & *ludicra phantasiæ* facetias homo *prudens* maximo studio
 evitare debet.

§. XIV. Quanti *abusus Phantasiæ* cum *moribundis* committantur doceet
 etiam quotidiana observatio, dum interdum *agonizantibus* pulvinar subtrahitur,
 ut facilius & *citius* moriantur, de qua mala consuetudine *conf. Ærestalii Diss.*
de Pulvinari morientibus non subtrahendo, aut quando *morientes* super *stramen-*
tum deponuntur, aut quando *mortuis* vel *moribundis* *spirituosa* offeruntur, quo
spiritus animales revocari queant, vel quando *lignum aloes* accenditur, ad ex-
 plorandum an ejusmodi subjecta vere mortua sint; an non in *talibus experi-*
mentis multa *lepida* phantasia contingat, facile judicare licet, a qua prudens
 medicus se & alios liberare debet: Multum porro ad morbos *exacerbandos* &
mitigandos contribuit *usus, lusus & abus* Phantasiæ, quando homines semper de
morbi suæ afflictionis *nova invasione* aut deterioratione cogitant, jemehr man
 an die Krankheiten gedencke, je schlimmer sie werden, exemplo *hypochondriacorum,*
melancholicorum, *spleneticorum*, solitudinem amantium & sub illa miras *phan-*
tasias de morbo suo formantium; ita vicissim phantasia cum *aliis negotiis* occu-
 pata ad *minuendos* morbos & dolores contribuit, testimonio *paroxysmi feбри-*
lis, singultus, Podagra &c. ejus utriusque observationis mentio facta fuit à *D.*
D. Preside in *Dissertationibus de Valetudinariis Imaginariis & Therapia Imagina-*
ria: & quid dicamus de *anno Climacterico*, quem multi cum horrore expe-
 ctant & ingrediuntur & cum *vite dispendio* subeunt; quod hic *eventus* multum
 cum *phantasiæ* abusu conspiret, demonstravit *Cornelius Bontekoe* de *non existen-*
tia anni Climacterici: etenim dum semel *anxius*, vel paullulum de *vita & sanita-*
te sua sollicitus, ille *metus* de hoc *fatali anno* insinuat, hinc *adventantem*
 illum admodum *expavescunt* & de *vita* sua *ambigunt*, semper vero de *necessitate*
 aut

aut *promptitudine* ac discreta *proclivitate* moriendi cogitant, und gebeycken sich manche darüber zu todt, quibus itaque evenit, quod hactenus phantasia sua volutarunt, quemadmodum enim *mors ex insomnio*, qualem *Höchstetterus* dec. 7. c. 1. p. 46. describit & *mors ex imaginatione*, qualis in *A. N. C. Dec. 1. an. 2. obs. 137.* & in app. p. 401. enarratur, fructus phantasiae est, ita multum, attamen non penitus, mors sub anno *climacterico* tali phantasiae *abusu* nititur: hisce Speciminibus abusus phantasiae annumeramus *sinistrum* medicamentorum *usum*, qui nonnunquam tali *perversa* & *corrupta* imaginatione nititur, dum subjecta *sensibilia* & non nisi *adverse* de remediis cogitantia, ut plurimum *contrarios* effectus experiuntur, adeo ut remedia, quae *motus* mitigare debent, illos *vehementius* commoveant: contra vero aliquando evenit, ut *incongrua* medicamina *salutarium* effectuum causa evadant, quando aegrotantes de illorum *utilitate* sibi *mira* concipiunt ac *promittunt*, aut quando ex *nimia fiducia* in *medicum* omnia auxilia ab eodem provenientia sibi *infallibilia* esse imaginantur; *conf. Roder. à Castro in Medico Politico: quid phantasia ad contrahendos morbos malignos quin ipsam pestem valeat, docent innumera testimonia; conf. Höchstetterus. dec. 7. c. 1. p. 47. 48. cas. 2. Bartholinus Hist. anat. Cent. 3. hist. 41. Cent. 4. hist. 76. Rejes qu. 66. p. 391. n. 16.* quicunque itaque cum *anxia* imaginatione inter ejusmodi aegrotantes versantur, facile à tali labe invaduntur: non minus in *teneris* animis *convulsivi* morbi aliquando cum *immoderata* phantasia concitantur, testimonio *Epilepsiae* per *imprecationem* provocata: ubi contingit, ut *sensibilia* talia subjecta *horridam* talem *imprecationem* cum *anxia* & *inquieta* imaginatione constanter animo repetant & recoquant, tandemque in talem morbum incidant: ita ante paucos annos obtigit talis casus *D. D. Praesidi* in studioso *novitatis* avido, qui hac sua *curiositate* tractus *conventicula* hominum cum praesumptis agitationibus *ecstaticis* exercitatorum, visitavit, inde vero ob *miras* *gesticulationes* & *agitationes* illorum, in phantasia sua ita *captus* est, ut *firmiter* de illis commotionibus insolitis cogitaret & tandem noctu cum *iisdem* motibus *correptus* fuerit, qui tamen posthac hoc modo liberatus fuit, dum illius contumax phantasia iterum in *requiem* tempestivam & necessariam conversa fuit: Plura Specimina usus, lusus & abusus phantasiae in *Medicina Practica* hoc loco proponere non placet, ne *propositos limites* transgrediamur: *viam* interim monstravimus, qua *ulterius* haec *consideratio* in *utilitatem* totius *Medicinae* augmentari, *illustrari* & si *meretur* etiam *emendari* poterit: Deo nunc devotas tribuimus gratias, quod ad hujus thematici commendationem & explicationem necessarias vires concedere voluerit, cui reliqua nostra conamina humillime consecramus.